

Phawuloosi Efesoona Asaas Xaafida Kiitaa Gaatha Qofaa

Phawuloosi Efesoona de7iya asaas xaafida kiitan ubbaafe aathidi xeellidabay, “Wodey gakkiiya wode Xoossay polanaw qoppida qofay, saloninne sa7an de7iya medhetetha ubbay Kiristtoosappe garssan gidana melassa” yaagiya qofaa (1:10). Hessa bolla gujjidi Yesuus Kiristtoosara de7iya issifetethan, asa zerethi ubbay issino gidana mela ha gita qofaa ooon peeshshana mela Xoossaa asaa hassayisees.

Efesoona kiitaa koyro kifiliyan xaafey kaara qofa gidida issifetethabaa xaafanaw doomidayssa dalggisidi, Xoossaa Aaway ba asaa waati dooridaakko, enttika iya na7aa, Yesuus Kiristtoosan bantta nagaraappe maarota demmidi waanidi la77a keyidaakkonne, Xoossaa gita ufayssa gaalay Geeshsha Ayyaana baggara tuma gideyssi erettidaakko odees. Nam77antho kifiliyan qassi xaafey ha kiitaa nabbabiya asay bantta issifetethaa de7uwan Kiristtoosan enttaw de7iya issifetethay tuma gidana mela entti waanidi daanaw bessiyako qofisees.

Asay Kiristtoosan de7iya issifetethaa waanidi daanaw bessiyako dumma dumma leemison qonccis. Woosa keethi asatethaa leemiso gidiya wode Kiristtoosi he asatethaas huu7e. Woosa keethi gimbe keethan leemisettiya wode Kiristtoosi he keethaa godaa xaphuwa minthiya waanna

shuchchaa. Woosa keethi machchin leemiset-tiya wode Kiristtoosi azinan leemiset-tis. Xaafey Kiristtoosa baggara qonccida Xoossaa aadho keehatethaa daro nashshidi odishe, giddoy ciim-mottiya haasaya haasayees. I ubbaa, Kiristtoosa siiquwa, iya yarshshetethaa, I immida na-gara atatethaa, iya aadho keehatethaanne iya geeshshatethaa baggara xeellees.

Efesoona kiitaa ayfe qofata

Sarotho 1:1-2

Kiristtoosanne woosa keethi 1:3-3:21

Kiristtoosan de7iya ooratha de7uwa 4:1-6:20

Kuushsha qofaa 6:21-24

¹ Xoossaa shenen Kiristtoos Yesuusa hawaare gidida Phawuloosappe, Efesoonaan de7iya geeshshatasinne Kiristtoos Yesuusa ammaneyssatas xaafettida kiitaa.

² Xoossaa nu Aawappenne Godaa Yesuus Kiristtoosappe aadho keehatethayenne sarotethay hintew gido.

Kiristtoosan de7iya ayyaana anjuwaa

³ Salon de7iya ayyaana anjjo ubban Kiristtoosa baggara nuna anjjida, nu Godaa Yesuus Kiristtoosa Aaway, Xoossay galatetto. ⁴ Nuuni iya sinthan geeshshatanne borey baynnayssata gidana mela Xoossay alamey medhettanaappe kase Kiristtoosa baggara ba siiquwan nuna dooris. ⁵ Xoossay ba sheniyann ba dosidayssada Yesuus Kiristtoosa baggara nuna ba nayta oothanaw kasetidi qoppi wothis. ⁶ Xoossay ba siiqiya Na7aa

baggara nuus coo immida aadho keehatethay bonchchettana mela hessa oothis.

⁷ Xoossaa aadho keehatethaa duretethaada Kiristtoosa suuthan wozettidi nagara atosethaa demmida. ⁸ Ba aadho keehatethaa cinccatethaninne eratethan kunthidi nuus immis. ⁹ Xoossay ba dosidayssada Kiristtoosa baggara iya sheniya xuuraa nu erana mela oothis. ¹⁰ Wodey gakkiya wode Xoossay polanaw qoppida qofay, saloninne sa7an de7iya medhetetha ubbay Kiristtoosappe garssan gidana melassa.

¹¹ Ubbabaa ba sheniyada oothiya Xoossay, kasetidi ba qoppi wothidayssada Kiristtoosa baggara nuuni iyabaa gidana mela nuna dooris.

¹² Hessa I oothiday, Kiristtoosan ufayssi wothidi naagon koyro gidida nuuni Xoossaa bonchchuwa galatan qonccisana melassa. ¹³ Hintteka hintte atosethaa Wonggelaa, hessika tuma qaala si7ida wode Kiristtoosa ammanideta. Xoossay hinttew immana gida Geeshsha Ayyaanan hintte attametideta. ¹⁴ Xoossaa bonchchoy galatettana mela Xoossay ba asaa wozana gakkanaw Geeshsha Ayyaana nuus oythu oothidi immis.

Phawuloosa woosaa

¹⁵ Hessa gisho, Godaa Yesuusa hintte ammaneyssanne geeshshata ubbaa hintte siiqeyssa ta si7ida wode ¹⁶ ta woosan hinttena qoppashe hintte gisho Xoossaa galateyssa aggabikke. ¹⁷ Godaa Yesuus Kiristtoosa Xoossay, bonchcho Aaway, Xoossaa hintte aathi eranaada cinccatethaanne qonccetha ayyaana hinttew immanaada taani Xoossaa woossays. ¹⁸ Xoossay

hinttena xeevida ufayssaynne geeshshati laattiya bonchcho laatay ay mela darookko hintte erana mela Xoossay hintte wozana ayfiyaa dooyana mela taani Xoossaa woossays.

¹⁹ Qassi iya ammaniyaa nunan oothiya iya wolqqay ay mela aadhdhida giteekko hintte erana mela woossays. He wolqqay xoonettonanne daaburonna wolqqaa. Ha nunan de7idi oothiya wolqqaynne, ²⁰ Kiristtoosa hayqoppe denthidi, salon Xoossaafe ushachcha baggara utisida gita wolqqay issino. ²¹ Iya sunthay, ayseyssatappenne maata aawatappe, haareyssatappenne godatappe, bolla gididi ha alamiya xalaalan gidonashin sinthafe yaana alamiyankka hara sunthata ubbaafe dhoqqa. ²² Xoossay ubbaa Kiristtoosa tohuwappe garssan haarisis; qassi woosa keethan ubban Goda gidana mela iya shuumis. ²³ Woosa keethay Kiristtoosa kumethi oothiya iya asatethaa. Medhetethay de7iya besa ubban Kiristtoosi ba huu7en ubbaba kuntheyssa.

2

Kiristtoosan hayqoppe de7o pinethi

¹ Hayssafe kase hinttee, hintte nagaraanne hintte qohuwa gaason hayqqidayssata. ² He wode hintte ha alamiya iita ogiya kaallideta. Carkkuwa bolla de7iya ayyaana wolqqata halaqaasinne ha77ika Xoossaas kiitettonna asaa haariya ayyaanas kiitettideta. ³ Nu ubbayka kase he asata gidдон nu asho amuwaanne nu wozanaa

sheniya kaallidi de7ida. Nukka harata mela nu medhetethan Xoossaa hanquwa ekkanaw de7eyssata.

⁴ Shin Xoossaa gita maarotethaafenne nuus de7iya gita siiquwappe denddidayssan, ⁵ hari attoshin nuuni nu qohuwan hayqqidi de7ishin Kiristtoosa baggara nuus de7o immis. Hintteka attiday Xoossaa aadho keehatethaana. ⁶ Xoossay nuna Kiristtoosara issife hayqoppe denthidi salo sohuwan iyara issife wothis. ⁷ I hessa oothiday, Kiristtoos Yesuusa baggara nuus qonccisida ba keehatethaanne zawi baynna ba aadho keehatetha duretethaa yaana laythan nuna bessanaassa. ⁸ Hintte aadho keehatethan ammanon attideta. Hessika, Xoossaa imotappe attin hintte ooson bentiidabaa gidenna. ⁹ Oonikka ceeqettonna mela atotethay bentiiday ooson gidenna. ¹⁰ Nuuni Xoossaa medhetethi; I nuus kasetidi giigisi wothida lo77o oosota oothana mela Kiristtoos Yesuusa baggara oorathi medhettida.

Kiristtoosara de7iya issifetethaa

¹¹ Hessa gisho, hinttenoo yeletan Ayhude gidonayssato, Ayhudeti bantaw asa kushen qaxxarettidi, hinttena qassi qaxxarettiboonayssata gidi xeegeyssa akeekite. ¹² He wode hintte Kiristtoosappe shaaketti de7idayssa, Isra7eele asaas alaga gididi de7idayssa, Xoossaa ufayssa qaalappe haakkidi de7idayssanne ha alamiyan ufayssinne Xoossi baynna de7idayssa akeekite. ¹³ Shin hintte kase haakkidi de7idayssati, ha77i Kiristtoos Yesuusan de7idi Kiristtoosa suuthan mata shiiqideta.

¹⁴ Kiristtoosi nu sarotethaa; I Ayhudenne Ayhude gidonna asaa timidi, nam⁷⁷aa shaakki wothida morkketetha godaa laallis. ¹⁵ I banan ha nam⁷⁷u zaretappe issi ooratha ase medhdhidi, higgsiya iya kiitaranne wogatara issife ba asatethan dhayssidi sarotethi immis. ¹⁶ Kiristtoosi masqaliya bolla hayqqidi morkketethaa dhayssis; qassi nam⁷⁷u zareta issi asatethi oothidi Xoossaara sigethis. ¹⁷ Kiristtoosi yidi, Xoossaafe haakkidi de⁷iya hinttew, qassi matidi de⁷iya entaw sarotetha Wonggelaa odis. ¹⁸ Nu ubbay iya baggara issi Ayyaanan Aawa sinthe shiiqanaw dandda⁷os.

¹⁹ Hizappe hintte allaga woykko imathe gidekketa, shin hintte ha⁷⁷i geeshshata biittaa asinne Xoossaa soo asi. ²⁰ Hintte hawaaretinne nabeti baasida baasuwa bolla keexettideta. Godaa xaphuwa minthiya shuchchay Kiristtoos Yesuusa. ²¹ Iyan keetha ubbay issife oykettidi Godan geeshsha Xoossa keethi gidanaw diccees. ²² Hintte qassi Xoossay ba Ayyaanan de⁷iya keethi gidanaw Kiristtoosan issife keexetteta.

3

Ayhude gidonna asaas hawaare gidida Phawuloosa

¹ Hessa gisho, taani, Phawuloosi, Ayhude gidonna hintte gisho Kiristtoos Yesuusan qasho asi gidas. ² Ta hinttena maaddana mela Xoossay ba aadho keehatethan taw immida ha oosuwabaa hintte loythi si⁷ideta. ³ Ta hinttew kase qanthan xaafidaysada Xoossay ba xuuraa qonccethan taw

qonccisis. ⁴ Ta xaafidayssa hintte nabbabiya wode Kiristtoosa xuuraa ta ay mela eridaakko hintte akeekanaw dandda7eeta. ⁵ Ha xuuray geeshsha hawaaretasinne nabetas ha77i Ayyaana baggara qonccidayssada beni wode asaas hessada qonccisibeenna. ⁶ Xuuray hayssa: Ayhude gidonna asay Wonggelaa baggara Isra7eeletara is-sife Xoossaa anjuwaa laattoosona. Isra7eeletara issi keetha asi gidoosona; Kiristtoos Yesuusa baggaara Xoossaa ufayssa qaala ekkoosona.

⁷ Xoossay ba oothiya wolqqaa baggara taw immida aadho keehatethan ha Wonggelas oosanchcho gidas. ⁸ Taani geeshshata ubbaafe laafa gidikkoka Ayhude gidonna asaas zawi baynna Kiristtoosa duretethaa Wonggelaa odana mela ha aadho keehatethay taw imettis. ⁹ Qassi kase wodiyan ubbaa medhdhida Xoossan qosettidi de7iya xuuras, Xoossaa qofay aybeekko qonccisanaw aadho keehatethay taw imettis. ¹⁰ Xoossay hessa oothiday ha77i wodiyan woosa keetha baggara salo sohuwan de7iya halaqatasinne haareyssatas ba dumma dumma qonccethaa erisanaassa. ¹¹ Xoossay ba merinaa qofaa nu Godaa Kiristtoos Yesuusa baggara polanaw hessa oothis. ¹² Nu ammanon yashshi baynna Xoossako shiiqana mela Kiristtoosi nuus minotethinne la77atethi immis.

¹³ Taani hintte gisho waaye ekkiya gisho hintte ta waayan yeellatonnaada hinttena woossays; taani hintte bonchchuwas waayettays.

Efesoona asaas woosettida woosaa

14 Taani aawa sinthan gulbbatada woossey hessa gishossa. 15 Saloninne sa7an de7iya issi issi soo asay iyan sunthettees. 16 Xoossay ba bonchcho duretethaafe hintte garssa asatethaa minthiya wolqqaa ba Ayyaana baggara immana mela hinttew woossays. 17 Qassi ammanon Kiristtoosi hintte wozanan daana melanne hintte siiqon xapho yeddidi minnidi daana mela woossays. 18 Hessadakka, Kiristtoosa siiqoy ay mela dalggeko, adusseeko, dhoqqekonne ciimmooko geeshshata ubbaara eriya wolqqaa hintte akeekana mela woossays. 19 Eratethaafe aadhdiya Kiristtoosa siiquwa hintte erana mela qassi de7o immiya Xoossaa wolqqan hintte kumana mela ta woossays.

20 Hiza, nu gidдон oothiya ba wolqqaa baggara nuuni woosseyssafe woykko qoppeyssafe aathidi oothanaw dandda7iya Xoossaas, 21 woosa keethaninne Kiristtoos Yesuusan wode ubban merinaappe merinaa gakkanaw bonchchoy gido. Amin77i.

4

Kiristtoosara de7iya issifetethaa

1 Hiza, Godaa gisho qashettida taani, hintte xeegettida xeessas bessiya de7o daana mela hinttena woossays. 2 Hintte ubba wode aadanne hayo gidite; issoy issuwa dandda7itenne siiqon de7ite. 3 Sarotethan qashettidi Ayyaanay immiya issifetethaa naaganaw minnite. 4 Xoossay hinttena xeevida wode issi ufayssas xeegidayssada issi asatethinne issi Ayyaani de7ees. 5 Issi Goday, issi

ammanoyenne issi xinqqatey de7ees. ⁶ Ubbaafe bolla gidida, ubbaa baggara oothiyanne ubbaa giddon de7iya issi Xoossay, ubbaa Aaway de7ees.

⁷ Shin Kiristtoosi immanaw koyidayssada nu issoy issoy dumma dumma imota ekkida. ⁸ Hessa gisho, Xoossaa qaalay,
“I pude keyida wode

di7ettida darota baara ekkidi bis;
asaaskka imotaa immis”
yaagees. ⁹ Yaatin, “Pude keyis” guussay woy gu-
ussee? I koyro duge, sa7aa ziqqa bessaa wodhdhis
guussu gidonna ixiko ay gussee? ¹⁰ Ha duge
wodhdhidayssi, ubba bessan benttanaw ubbaafe
dhoqqa saluwa keyidayssi iya.

¹¹ I issota issota hawaareta, issota issota na-
beta, issota issota Wonggela sabaaketa, issota is-
sota woosa keethi heemmeysata, issota issota
asttamaareta oothidi immis. ¹² I hessa ooth-
iday Kiristtoosa asatethi gidida woosa keethi
dichchanawunne ammaniyaa asaa Xoossaa oosos
giigisanaassa. ¹³ Hessadakka, nu ubbay Xoossaa
Na7aa eridi ammanon benttiya issifetethaakko
gakkidi, Kiristtoosa ayyaana de7uwa kumethaa
gakkidi diccana melassa.

¹⁴ Hizappe guye, asaa gene cimona giigida
balethiya worddo timirtte carkkoninne hobben
gedenne haa kuullo kaa7iya nayta mela gidanaw
bessenna. ¹⁵ Shin nuuni tumaa siiqon odishe
asatethaas huu7e gidiya Kiristtoosara de7iya
issifetethaa gujji gujji dichchoos. ¹⁶ Kumetha
asatethay Kiristtoosa bolla zemppees qassi
dumma dumma asatetha billiteti issoy issuwara

oykettidi uttis. Issi issi asatetha kifiley ba oosuwa oothiya wode kumetha asatethay siiqon diccees.

Kiristtoosan ooratha de7o

¹⁷ Hessa gisho, taani hayssa hinttew Godaa sunthan odaysinne markkattays. Go77i baynna qofaa qoppiya Ayhude gidonna asatada de7oppite. ¹⁸ Entta qofay dhumis; bantta wozanaa muumisidosona. Entti eratetha dhayoninne ixzas gidi Xoossay immiya de7uwappe haakkidosona. ¹⁹ Entti yeella giyabaa erokkonna; entti laymatethas banttana aathi immidosona; qassi tunabaa ubbaa guye goonna oothoosona.

²⁰ Shin hintte Kiristtoosa eriday hessa mela ogen gidenna. ²¹ Iyabaa tuma si7ideta. Qassi Yesuusan de7iya tumaa mela iyappe tumaarideta. ²² Hintte kase de7iya de7o ogiya aggite. Qassi ba cimmiya amon dhaya hintte ceega asatethaa diggite. ²³ Hintte wozanaa qofan ooraxite. ²⁴ Tuma xillotethaninne geeshshatethan Xoossaa leemison medhettida ooratha asatethaa ma77ite.

²⁵ Hiza, worddo odettofite. Nuuni ubbay Kiristtoosa asatethaa billiteta gidiya gisho asa ubbaara tuma odettite. ²⁶ Hanqettite, shin hintte hanquwan nagara oothofite. Hintte hanqeti de7ishin awi wullofo. ²⁷ Xalahes besse immofite. ²⁸ Kaysiya uray hizappe guye kaysotoppo. Shin manqota maaddiyabay iyaw daana mela ba kushen lo77obaa ootho.

²⁹ Hintte doonappe iita qaali keyoppo. Shin si7eyssata go77ana melanne harata minthethiya

koshshiya lo77o qaali hintte doonappe keyo. ³⁰ Xoossay hinttena woziya gallasaas hinttena at-tamidi wothida Xoossaa Ayyaana azzanthofite. ³¹ Cametethi, yilo, hanqo, waaso, cashshenne iita ubbaa hinttefe haassite. ³² Aathidi issoy issuwas keehanne qadhetteyssata gidite. Xoossay Kiristtoosa baggara hintteew atto gidayssada hintteka wolis atto giite.

5

¹ Hiza, Xoossay dosiya naytada iya daanite. ² Kiristtoosi nuna dosidi bana nu gisho Xoossaa sawiya imonne yarshsho oothidi immidayssada hintteka siiqon de7ite.

³ Shin laymatethi, tunatethinne uuzetethi ammaniyaa asaas bessonna gisho hintte gidдон ubbaraka si7ettofo. ⁴ Xoossaa galatiteppe attin yeellayabaynne eeya odi woykko qidhey hintteew bessonna gisho hintte gidдон ubbaka de7oppo. ⁵ Hayssa erite; oonikka laymatey woykko tunabaa oothey woykko uuzettey Kiristtoosa kawotethaanne Xoossaa kawotethaa laattanaw dandda7enna. Uuzetethi eeqa goynno mela.

⁶ Hayssata gaason Xoossaa hanqoy kiitettonna asaa bolla yaana gisho oonikka hinttena pathonna odan cimmofo. ⁷ Hessa mela asaara issifetethi oothofite. ⁸ Kase hintte dhuman de7ideta, shin ha77i Godaa baggara poo7on de7eeta. Hiza, poo7o asada poo7on simerettite. ⁹ Poo7oy lo77otethi, xillotethinne tumatethi ayfees.

¹⁰ Godaa ufaayssiyabaa oothanaw koyite.
¹¹ Go77i baynna dhuma ooso qonccisiteppe attin iyara issifoppite. ¹² Entti geeman oothiya oosuwa hari attoshin odanawukka yeellayees. ¹³ Shin ubbabay poo7on keyaa wode qonccen benttees. ¹⁴ Poo7oy ubbabaa qonccen bessees. Hessa gisho, “Neno dhiskkeyssso barkka; hayqoppe dendda; Kiristtoosi ne bolla poo7ana” yaagettis.

¹⁵ Hiza, hintte waanidi de7iyakko akeeki be7ite. Cinccata giditeppe attin eeyata gidoppite. ¹⁶ Laythay iita gidiya gisho injjetiya wode ubbaa go7ettite. ¹⁷ Hessa gisho, Godaa sheney aybeekko akeekiteppe attin eeyoppite.

¹⁸ Geeshsha Ayyaanan gallas gallas kumiteppe attin dhayokko hinttena kaaletiyya gisho woynne ushsan mathottofite. ¹⁹ Mazmuren, sabaninne ayyaana yethan, issoy issuwara odetite. Qassi hintte wozanan zammarishenne sabbishe Godaa galatite. ²⁰ Nu Godaa Yesuus Kiristtoosa sunthan ubba wode Xoossaa Aawa ubbabaas galatite.

²¹ Kiristtoosa bonchchuwas gidi issoy issuwas haarettite.

Azinabaanne machchibaa

²² Machcheto, Godaas haaretteyssada hintte azinatas haarettite. ²³ Kiristtoosi woosa keethaas huu7e gideyssada azinikka ba machchees huu7e. Qassi Kiristtoosi ba asatethi gidida woosa keethaa ashsheyssa. ²⁴ Shin woosa keethay Kiristtoosas haaretteyssada machcheti bantta azinatas ubbaan haarettanaw bessees.

²⁵ Azinatoo, Kiristtoosi woosa keethaa dosidi bana iw immidayssada hintteka hintte machcheta dosite. ²⁶ I woosa keethaa ba qaala baggara haathan meeccidi geeshshis. ²⁷ Kiristtoosi woosa keethaa qiti woykko som77o tuussi woykko hessa melabay baynna I kumetha bonchchuwara geeshshinne borettonnaaro oothidi baakko shiishanaw koyidi hessa oothis. ²⁸ Hessadakka, azinati banttana doseyssada bantta machcheta dosanaw bessees. Ba machchiw doseyssana bana dosees. ²⁹ Bana ixxiya asi oonikka baawa, shin Kiristtoosi woosa keethaas oothayssada ba asatethaa muzeesinne naagees. ³⁰ Nuuni Kiristtoosa asatethaa billiteta.

³¹ Xoossaa qaalay, “Hessa gisho, asi ba aawanne ba aayiw aggidi, ba machcheera issife daana; entti nam77ayka issi asho gidana” yaagees. ³² Hayssi gita xuura, shin taani hessa Kiristtoosabaanne woosa keethabaa leemiso oothada odays. ³³ Gidoshin, hintte issoy issoy hintte machcheta hinttee, hinttena doseyssada dosite. Issi issi machcha ba azinaa bonchchanaw bessees.

6

Naytabaanne yelidayssatabaa

¹ Nayto, hintte Godaaba gidinya gisho hinttena yelidayssatas kiitettite. Hessi hinttew bessiyabaa. ² “Ne aayiwunne ne aawa bonchcha.” Hessi ufayssa qaali de7iya koyro kiitaa. ³ “Ne hessa poliyabaa gidikko ubbay new injjetana; ne laythay sa7a bolla aduqqana.”

5:25 Qola 3:19; 1Phexi 3:7

5:31 Medhe 2:24

6:1 Qola 3:20

6:2 Kessa 20:12; Zaare 5:16

⁴ Aawato, hintte nayta Godaa qaala taaarssoninne entta kaaleson dichchiteppe attin enttana caamisoppite.

Godatabaanne aylletabaa

⁵ Aylleto, Kiristtoosas kiitetteyssada hintte sa7a godatas yashshan, bonchchoninne suure wozanan kiitettite. ⁶ Entta sinthan saba demmanaw entti be7iya wode xalaala oothofite. Shin Kiristtoosa aylletada Xoossaa sheniya wozanappe polite. ⁷ Asas gidonnashin Godaas gidi hintte kumetha wozanaappe oothite. ⁸ Aylle gidin woykko goda gidin issoy issoy ba oothida lo77o oosuwas Godaappe woyto ekkanaayssa ereeta.

⁹ Godato, asa som77o be7idi maaddonna Goday, saluwan de7eyssaa ereeta. Hessa gisho, hintte aylleta manddeyssa aggidi entti hinttew bonchchon kiitetteyssa mela hintte enttaw lo77obaa oothite.

Xoossaa ola miisheta

¹⁰ Wurssethan, Godaaninne iya gita wolqqan minnite. ¹¹ Xalahe cimuwa eqettanaw dandda7ana mela Xoossay hinttew immida ola miishiya ubbaa ma77ite. ¹² Nu olay asara gidonnashin salon de7iya tuna ayyaana olanchchotara, maata aawatara, haareyssataranne ha dhuma alamiya wolqqatara.

¹³ Hessa gisho, iita gallasaa teqqanawunne ubbaa polidi, minnidi eqqanaw hintte dandda7ana mela Xoossaa ola miisheta ubbaa ma77ite. ¹⁴⁻¹⁵ Tumaa xeessan danccoda danccidi, xillotethaa xurureda tiran wothidi, sarotethaa

Wonggelaa hintte tohuwan caammada aathidi minnidi eqqite. ¹⁶ He ubbaafe aathidi, Xalahey yeddiya laxiya tama dongge ubbaa toysanaw dandda7iya ammanuwa ubba wode gonnaldleda oykkite. ¹⁷ Xoossaa atotetha biraata barnneexada hintte huu7en wothite; qassi Geeshsha Ayyaana mashshaa, ikka Xoossaa qaalaa oykkite. ¹⁸ Woossa aggofite; harataskka gaannatite; ubba wode Ayyaanan woossite. Hessian, geeshshatas salettonna minnidi ubba wode woossite.

¹⁹ Taani Wonggelaa xuuraa yashshi baynna qonccisada odana mela Xoossay taw qaala immana mela woossite. ²⁰ Taani hessa oothanaw kiitetas ha77ika qashon de7ey he Wonggelaa gishossa. Yaaniya gisho, taani yashshi baynna besseyssada odana mela taw woossite.

Wurssetha sarotho

²¹ Taani waana de7iyakkonne ay oothiyako hintte erana mela nu siiqo ishay, Godaa oosuwan ammanettida oosanchchoy, Tikiqoosi, tabaa ubbaa hinttew odana. ²² Nuuni ubbay waanidi de7iyakko hinttew odana melanne hinttenu minthethana mela taani iya hintteko kiittas.

²³ Xoossaa Aawappe, Godaa Yesuus Kiristtoosappe sarotethayenne siiqoy ammanora issife ammaniyaa ubbaas gido. ²⁴ Irxxonna siiqon nu Godaa Yesuus Kiristtoosa siiqiya ubbaara Xoossaa aadho keehatethay gido.

6:14-15 Isa 11:5; Isa 59:17; 52:7
20:4; 2Ximo 4:12; Qola 4:7-8

6:17 Isa 59:17

6:21 Ha.O

Ooratha Caaquwa Goofatho New Testament in Gofa (ET:gof:Gofa)

copyright © 2011 Wycliffe Bible Translators, Inc.

Language: Gofa

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gofa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 11 Nov 2022 from source files
dated 30 Dec 2021
8695a6a5-d671-5199-996c-6069adce0ebd